

Director di APA contento cu e disciplina di e hobennan

Periodo di stage di Formacion Social ta prepara hobennan pa drenta mercado laboral



Sels hoben cu a finalisa e prome parti di e Formacion Social na Marinieskazerne, awor a cuminsa cu nan parti di stage na Aruba Ports Authority, caminda nan ta bay traha durante 4 luna.

Na final di e prome parti di e Formacion Social, 12 hoben cu orguyo a ricibi nan certificado. Di e grupo aki un grupo di seis hoben a bay Valero pa core nan stage y e otro sels a bay APA.

Den combersacion cu Sr. Alfonso Boekhoudt, director di APA, el a splica, cu tabata pa casualidad cu nan a bin cay den e programa aki, cu a yega na nan atencion durante un combersacion cu nan tabatin cu director di Valero. E ehecutivo a haci un apelacion na APA pa tuma su responsabilidad civico, participando den e programa aki. Despues di reunionnan, internamente e decision a wordo tuma pa duna un man na e programa aki, contribuyendo cu e periodo di stage di e par-

ticipantenan.

Di e prome grupo, seis hoben durante un periodo di 4 luna lo ta integrante den e departamento di seguridad. Nan a drenta como aspirant bewaker, durante cu nan ta haya e entrenamiento cu tur empleado nobo den e area aki ta ricibi. Na momento cu nan finalisa cu e training, e hobennan aki ta completamente entrena den sistemanan di seguridad, cu ta uno aproba door di autoridadnan internacional, y por realisa trabou riba e tereno aki. Na final di e entrenamiento den APA, nan mester pone e trabou den practica tambe, trahando den e funcion di bewaker, coriendo warda mescos cu tur empleado. APA lo sigui contribui cu e programa y ta kere cu pa e otro grupo, ta trata di hinca nan den otro departamento, sea tecnico of nautico, dependiendo di kico e parti teoretico cu nan a pasa aden tabata. E poco dia cu e hobennan ta na APA, Sr. Boekhoudt ta bisa cu el ya a constata cu nan ta hopi motiva y prepara pa traha y cu nan tin un caracter di disciplina. Varios di e hobennan acerca pa comentario riba e prome parti di e SVP, a indica cu e estudio tabata uno bon pa nan; e tabata

duro na inicio pero cu ayudo di otro y nan famia a logra yega te na e fase aki. Loke tabata remarcabel ta, e hobennan aki ta sinti nan mes asina bon cu loke e SVP a duna nan, e reconocimiento cu nan por algo. "Mi ta contento cu mi famia ta sinti su mes orguyoso di mi; e hendenan riba caya ta reconece y felicita nos. Nos ta e promenan di e programa aki y nunca lo wordo lubida," Sjamir Noguera, un participante di SVP, a duna di conoce. El a agrega cu e programa a yuda nan cu disciplina cu ta masha importante den bida.

E hobennan a muestra entusiasmo, pa motibo cu e stage na APA lo brinda miho posibilidad pa nan bida.

"E ta un experiencia fabuloso, e no ta un experiencia cu bo no ta pasa aden si no ta den e Sociale Vorming of un trayecto asina aki," Fredrich Ras a comenta. El a splica cu el a drenta e SVP pa tin un direccion cu e por bay. "Hobennan cu no a caba scol, cu no sa kico pa haci, si boso haya un oportunidad manera e Sociale Vorming, drenta aden. Bo no tin nada di perde; al contrario, portanan ta habri pa bo" Ras a bisa.



AWEMainta****
el corazon di Aruba

Nos e-mail:

noticia@awemainta.com

Tel: 583-1400

Fax: 583-1444